

## O B R A Z L O Ž E N J E

### UZ NACRT PRAVILNIKA O OBAVEZONOM UDJELU I PREUZIMANJU ELEKTRIČNE ENERGIJE PROIZVEDENE IZ OBNOVLJIVIH IZVORA ENERGIJE

Regulatorna komisija za energiju u Federaciji Bosne i Hercegovine – FERK ovim obrazloženjem objašnjava pravni i činjenični osnov za donošenje Nacrta pravilnika o obaveznom udjelu i preuzimanju električne energije proizvedene iz obnovljivih izvora energije.

Obrazloženje je izrađeno da bi se omogućilo javnosti razumijevanje pravnog osnova koji FERK mora uvažavati u postupku donošenja opštih akata kojima se, na osnovu zakonskog ovlaštenja, na opšti način uređuju pravni odnosi u cilju razrađivanja i primjene pojedinih zakonskih odredbi, a namjera FERK-a je ovim pravilnikom propisati obavezu, način i proceduru preuzimanja električne energije proizvedene u postrojenjima koji koriste obnovljive izvore energije od kojih Operator za obnovljive izvore energije i efikasnu kogeneraciju vrši otkup električne energije za sve snabdjevače koji snabdjevaju krajnje kupce u Federaciji Bosne i Hercegovine.

#### I. PRAVNI OSNOV

**Zakon o korištenju obnovljivih izvora energije i efikasne kogeneracije („Službene novine Federacije BiH“ broj 82/23)**

Članom 59. stav (6) Zakona o korištenju obnovljivih izvora energije i efikasne kogeneracije propisano je da su svi snabdjevači koji snabdjevaju kupce u Federaciji Bosne i Hercegovine obavezni preuzeti pripadajući dio električne energije proizvedene korištenjem obnovljivih izvora energije u skladu sa tim zakonom i aktima FERK-a do uspostave organizovanog tržišta električne energije za dan unaprijed. Stavom (8) istog člana propisano je da do uspostave organizovanog tržišta električne energije za dan unaprijed, FERK u skladu sa planskim dokumentom za energije i klimu Federacije Bosne i Hercegovine i ciljevima iz predmetnog zakona, donosi Pravilnik o obaveznom udjelu i preuzimanju električne energije proizvedene iz obnovljivih izvora energije kojim, između ostalog propisuje: a) način izračunavanja minimalnih količina električne energije proizvedene iz obnovljivih izvora energije sa kojima Operator za obnovljive izvore energije i efikasnu kogeneraciju ima zaključen ugovor o otkupu, b) procedure preuzimanja minimalnih količina električne energije proizvedene u postrojenjima iz obnovljivih izvora energije i efikasne kogeneracije svih snabdjevača, c) procedure svih snabdjevača koji snabdjevaju krajnje kupce u Federaciji Bosne i Hercegovine da otkupljuju proizvedenu električnu energiju od proizvođača iz obnovljivih izvora energije sa kojima Operator za obnovljive izvore energije i efikasnu kogeneraciju ima zaključen ugovor o otkupu, d) ostale odredbe bitne za obavezan udio i preuzimanje električne energije iz obnovljivih izvora energije.

#### II. RAZLOZI ZA DONOŠENJE PRAVILNIKA

U cilju izvršenja svoje nadležnosti, FERK je utvrdio Nacrt pravilnika o obaveznom udjelu i preuzimanju električne energije proizvedene iz obnovljivih izvora energije.

Usljed nastale zakonske obaveze, prilikom utvrđivanja Nacrta pravilnika o obaveznom udjelu i preuzimanju električne energije proizvedene iz obnovljivih izvora energije, FERK je imao u vidu ciljeve Zakona o korištenju obnovljivih izvora energije i efikasne kogeneracije, a posebno

promovisanje i regulisanje proizvodnje električne energije iz obnovljivih izvora energije i efikasne kogeneracije, radi potrošnje na domaćem tržištu i uvećanja udjela u ukupnoj potrošnji energije, te umanjeње ovisnosti od fosilnih goriva i njihovog uticaja na okolinu, kao i racionalnije korištenje i raznolikost primarnih izvora energije. Pri tome, FERK je prilikom utvrđivanja Nacrta pravilnika o obaveznom udjelu i preuzimanju električne energije proizvedene iz obnovljivih izvora energije, posebnu pažnju posvetio i svojim dosadašnjim iskustvima i informacijama, stečenim u izvršavanju svojih ostalih zakonom propisanih nadležnosti, te u primjeni postojećeg Pravilnika o obaveznom udjelu i preuzimanju električne energije proizvedene iz obnovljivih izvora energije („Službene novine Federacije BiH“ broj 99/16).

S obzirom na naprijed navedeno, FERK se opredijelio za regulisanje ove materije kao u Nacrtu pravilnika o obaveznom udjelu i preuzimanju električne energije proizvedene iz obnovljivih izvora energije.

### **III. PREDMET RAZMATRANJA PRAVILNIKA**

Nacrtom pravilnika o obaveznom udjelu i preuzimanju električne energije proizvedene iz obnovljivih izvora energije propisuju se: način izračunavanja minimalnih količina električne energije proizvedene iz obnovljivih izvora energije sa kojima Operator za obnovljive izvore energije i efikasnu kogeneraciju ima zaključen ugovor o otkupu, zatim procedure preuzimanja minimalnih količina električne energije proizvedene u postrojenjima iz obnovljivih izvora energije i efikasne kogeneracije svih snabdjevača, te procedure svih snabdjevača koji snabdjevaju krajnje kupce u Federaciji Bosne i Hercegovine da otkupljuju proizvedenu električnu energiju od proizvođača iz obnovljivih izvora energije sa kojima Operator za obnovljive izvore energije i efikasnu kogeneraciju ima zaključen ugovor o otkupu.

### **IV. SVRHA OBRAZLOŽENJA**

Svrha obrazloženja je informisanje javnosti o činjeničnim i pravnim osnovama Nacrta pravilnika o obaveznom udjelu i preuzimanju električne energije proizvedene iz obnovljivih izvora energije.

Ukoliko se iz sažetka komentara zainteresovanih lica ocijeni da je neophodna suštinska revizija Nacrta pravilnika, FERK će obnoviti postupak opšte rasprave, u skladu sa članom 36. stav (2) Poslovnika o radu Regulatorne komisije za energiju u Federaciji Bosne i Hercegovine („Službene novine Federacije BiH“ broj 95/23) i članom 12. stav (2) Pravilnika o javnim raspravama („Službene novine Federacije BiH“ broj 95/23).

Ukoliko su komentari takve prirode da ne zahtijevaju suštinsku izmjenu ili ukoliko FERK odluči ne vršiti reviziju predloženog teksta, isti će staviti na dnevni red redovne sjednice, razmotriti i usvojiti.

### **V. PLANSKE AKTIVNOSTI FERK-a**

Nacrt pravilnika o obaveznom udjelu i preuzimanju električne energije proizvedene iz obnovljivih izvora energije FERK je usvojio na III redovnoj sjednici održanoj 31.1.2024. godine. Obavještenje o održavanju sjednice objavljeno je 26.1.2024. godine, na službenoj internet stranici FERK-a.

Uz Nacrt pravilnika, FERK je na istoj sjednici usvojio i tekst Obrazloženja uz ovaj nacrt i utvrdio tekst Obavještenja za javnost, za prikupljanje komentara i održavanje usmene opšte rasprave. Obavještenje za javnost za prikupljanje komentara i održavanje usmene opšte rasprave tokom koje će FERK primati komentare javnosti, objavit će se na službenoj internet stranici FERK-a.

Zainteresovana pravna i fizička lica mogu podnositi pisane komentare na Nacrt pravilnika o obaveznom udjelu i preuzimanju električne energije proizvedene iz obnovljivih izvora energije u periodu od dana objavljivanja obavještenja do dana isteka roka za podnošenje pisanih komentara. Nacrt pravilnika sa Obrazloženjem moći će se preuzeti u sjedištu FERK-a, na protokolu, Kneza Domagoja 12 A u Mostaru ili na službenoj internet stranici FERK-a, [www.ferk.ba](http://www.ferk.ba), u periodu od 2.2. do 29.2.2024. godine, kada ističe rok za podnošenje pisanih komentara. Pisani komentari moraju biti potpisani.

Nacrt pravilnika o obaveznom udjelu i preuzimanju električne energije proizvedene iz obnovljivih izvora energije sa Obrazloženjem će se samoinicijativno dostaviti Operatoru za obnovljive izvore energije i efikasnu kogeneraciju.

FERK će održati usmenu opštu raspravu o Nacrtu pravilnika 26.2.2024. godine, u Mostaru, u prostorijama FERK-a, sa početkom u 11:00 sati.

Na usmenu opštu raspravu mogu doći sva zainteresovana pravna i fizička lica, kojim će se pružiti mogućnost davanja komentara na Nacrt pravilnika. Vremenski rok za davanje komentara bit će ograničen u skladu sa uputstvima datim tokom usmene opšte rasprave. Voditelj rasprave je lice koje odredi FERK.

Svi primljeni pisani i usmeni komentari će biti pažljivo razmotreni, te će isti uz Izvještaj voditelja postupka sa opšte rasprave biti objavljeni na službenoj internet stranici FERK-a.

Prijedlog pravilnika o obaveznom udjelu i preuzimanju električne energije proizvedene iz obnovljivih izvora energije pripremljen od voditelja postupka opšte rasprave bit će razmatran u svrhu usvajanja na redovnoj sjednici FERK-a koja će se održati u skladu sa planom rada FERK-a o čemu će javnost biti blagovremeno obaviještena.

Kada bude usvojen, Pravilnik o obaveznom udjelu i preuzimanju električne energije proizvedene iz obnovljivih izvora energije se dostavlja na objavu „Službenim novinama Federacije BiH“.

FERK zadržava pravo izmjene ovih planskih aktivnosti.